

MUKANDA A NTUNDU WAKAFUNDELA PAULU ASI

KORETO

Paulu Ambâtumela Moyo

1 Dimi Paulu, laketama uma lu lulangu la Unyashungu dia ndjala utumami a Jesu Kristu, la onengesu Sosetene,

2 Le Ekelezia wa Unyashungu wa la Koreto, le wane wakakidama le Kristu Jesu, waketama dia ndjala ekilami, kame la wane tshe watetaka lukumbu la Khumesu Jesu Kristu lu ahuli tshe, Khumewo ndu Khumesu:

3 Ngandji ka mamba kayali la nyu, ndu ki k'uma le Unyashungu Shesu, la uma le Khumadiondjo Jesu Kristu!

Ambuka Unyashungu Lusaka

4 Dimi latukaka Unyashungu ami lusaka dikambu dianyu, ne dia ngandji ka mamba ka Unyashungu kakawayusha le Kristu Jesu. 5 Ndi akanyongonya lu akambu tshe, ndu lu aui tshe, ndu lu bewu tshe — 6 uku okone akashikimala diui dia Kristu le nyu — 7 okone nyu hanyuhandja nduku ushasha lam'alungamelanyu enelo ka Khumesu Jesu Kristu. 8 Ndi ayunyushikike edja ndu l'ekumelu, dia nyu ndjala aha la unungu lu lushi la Khumesu Jesu Kristu. 9 Unyashungu lakanyeti lu diekesanelu dia On'andi Kristu Khumesu, eko la kolamelu.

Ambasengasenga Dia Vo Ndjala Kame

10 Anyasu, dimi lambunyosengasenga lu lukumbu la Khumesu Jesu Kristu, dia nyu tshe mvuta diui otoi, diaha nyu mbatana, keli dia nyu nduwanyema lu yimba ndu lu tukanyi kame. 11 Anyami, asika Koloe, wakamvutela akambu anyu vati: Tamu teko l'atei anyu. 12 Diako mbatami nti: Nyu nyatutaka unto l'untu ati: Dimi usika Paulu; Dimi usika Apolo; Dimi usika Kefasi; Dimi usika Kristu. 13 Kristu ambatana uka? Paulu kakanyuvwela lu utamba a mpeketanya? Nyu nyakabatizama lu lukumbu la Paulu? 14 Dimi lambuka Unyashungu lusaka, ne dia dimi kumbatiza nduku usikanyu, paka Kirispo la Ngayo; 15 ne dia unto atukuta ati: Dimi lakabatizama lu lukumbu la Paulu. 16 (Dimi lakabatiza ndu khumbu ka Stefana.

Ladiku dia aso, dimi haluho nti: Lakabatiza untu ukina.) 17 Ne dia Kristu kuntumami dia mbatiza, keli ne dia nsambisha lukumu ololo aha la yimba y'au, ne dia utamba a mpeketanya a Kristu atukuyala uyalayala.

"Kristu Wulu a Unyashungu, Ndu Yimba ya Unyashungu"

18 Ne dia diui dia utamba a mpeketanya dieili dikambu di'enginya le wane wakashisho, keli le su, shu wane wakashimbamela, dia dieko wulu a Unyashungu. 19 Ne dia akafundama ati: Dimi layulanya yimba y'akanga a yimba, Layunya lononga l'akanga a lononga. 20 Lend'eli kanga yimba na? Lend'eli ufundji? Lend'eli kanga tamu l'etena kene? Unyashungu kunkadimula yimba ya kete nye, yayali enginya uka? 21 Ne dia tambena yimba ya Unyashungu shati: Antu kumbeya Unyashungu uma lu yimba yawo, okone Unyashungu akasonola dinginya dia nsambisha diui diandi, ne dia nshimbela wane wawetawo. 22 Tambena shati: Asi Juda watolombaka tulimbitelu, asi Ngirika watuyangaka tumba, 23 keli shu tatusambishaka dia Kristu, lakawadiaki l'utamba a mpeketanya, leli uku utamba a ntakanya le asi Juda, leli uku enginya le wedja. 24 Keli le wane waketama, ndu asi Juda ndu asi Ngirika, Kristu eko wulu a Unyashungu, ndu yimba ya Unyashungu. 25 Ne dia enginya ka Unyashungu kambuleka yimba y'antu, la wodu a Unyashungu ambuleka wulu w'antu.

Unyashungu Akasonola Akanga a Dinginya wa la Kete

26 Anyasu, nyukani dia leta lanyu! Aha akanga a yimba y'alimba efula, kuyanga akanga a wulu efula, kuyanga eshilambu efula mbaketama, 27 keli Unyashungu akasonola akanga a dinginya wa la kete, dia ndi mbutscha akanga a yimba sonyi. Unyashungu akasonola wane weli wodu wa la kete, dia ndi mbutscha akanga a wulu sonyi. 28 Unyashungu akasonola ndu diango diukitshikitshi ndu dionywama dia la kete,

ndu diango dieli kemako, dia ndi nkadimula diango dieko, diayali kemako, 29 ne dia untu atukuyatumbula la ntundu ka Unyashungu. 30 Keli nyu nyeli antu andi le Kristu Jesu, lako lakayala uku yimba yasu uma le Unyashungu, ndu ololo asu, ndu ekidiamelu, la etshungwamelu kasu; 31 uku akafundama ati: Untu layatumbula, ayatumbuli le Khumadiondjo.

Yimba ya Unyashungu la Yimba ya la Kete

2 Anyasu, lam'akamayi le nyu, dimi kundja la aui wa mamba kana wa yimba, dia ndjunyusambisha diui dia Unyashungu. 2 Ne dia dimi kunsanguya dia mbeya dikambu dikina l'atei anyu, tshikima dia Jesu Kristu, lakadiakema l'utamba a mpeketanya. 3 Dimi laki la nyu la wodu, la woma, la lukumba efula. 4 Ku aui ami la esambishelu kami, dimi kunyanga nyetawuya l'aui a yimba, keli tshikima la enyelo ka Nyuma la ka wulu, 5 dia mbetawo kanyu tayalaki lu yimba y'antu, keli lu wulu a Unyashungu.

6 Keli shu tatutaka aui a yimba l'atei a wane wambutshunda. Keli aha yimba y'etenetene kene, aha y'embuledi w'etenetene kene, weko wambanyema dia mumo. 7 Keli shu tatutaka yimba ya Unyashungu yaki l'usheshe, yako yakashama, yakadjanga Unyashungu la ntundu ka tena ne, dia shu ndjala la lutumbu. 8 Nduku umbuledi otoi w'etenetene kene wakeyi. Utuwuya, tshiki vo kundjaka Uwandji a lutumbu l'utamba a mpeketanya. 9 Keli, uku ufundami ati: Akambu wahatenyi ashu, akambu wahatuki atui; Akambu wahatoto l'utema w'untu, Akambu ane mbakalongoswela Unyashungu wane wülanga. 10 Keli Unyashungu akatenyawo uma le Nyuma kandi, ne dia Nyuma atushishimaka akambu tshe, ee, ndu akambu a waki wa Unyashungu. 11 Untu akona leya akambu w'untu, ndu aha nyuma k'untu keli le ndi? Okone nduku untu leya akambu wa Unyashungu, naka aha Nyuma ka Unyashungu. 12 Keli shu kunungula nyuma ka la kete nye, takalungula Nyuma k'uma le Unyashungu, dia shu mbeya ushasha wakatusha Unyashungu. 13 Akambu ane mbatututaka, aha la aui watetshaka yimba y'antu, paka la aui watetshaka Nyuma.

14 Untu a la kete halungula akambu wa Nyuma ka Unyashungu, ne dia vo weko uku akambu w'ananyaya le ndi. Ndi heyi mbalimbitelaka, ne dia vo watulimbitchiyamaka le Nyuma. 15 Keli one leli la Nyuma,

atulimbitelaka akambu tshe, ku nduku untu lülimbitshiya. 16 Akona akeyi yimba ya Khumadiondjo, dia ndi mbulakanya? Keli shu teli la yimba ya Kristu.

Mbatana lu Ekelezia ka la Koreto

3 Anyasu, dimi kumbeya nyutela diui uku akanga a Nyuma, keli uku antu wa la kete, uku le ana w'ashashi lu dikambu dia Kristu. 2 Dimi lakanyusha awele, aha ma, ne dia nyu tanyaki la wulu; ndu kakiane nyu kema la wulu, 3 ne dia nyu nyeki l'akambu wa dimba. Ne dia kandjema la tamu weki l'atei anyu, nyu kema wa lu alimba, hanyuyeli ditshelu di'antu uka? 4 Lam'ayuta untu omotshi ati: Dimi usika Paulu; la ukina ati: Dimi usika Apolo; okone nyu kema uku antu wa la kete uka?

Atumami Weko Ekambi Etu

5 Akona eli Apolo? Akona eli Paulu? Ekambi mbewo, nyu nyaketawo dikambu diawo uku akawasha Khumadiondjo wulu untu l'untu. 6 Dimi lakune, Apolo akatela ashi, keli Unyashungu akatosha diango. 7 Okone ndu one lakune, ndu one lakatela ashi, kema la dikambu, paka Unyashungu latotoshaka diango. 8 One latuneka, ndu one latutelaka ashi, weko kame, keli untu l'untu ayulungula difutu uku ulimu andi. 9 Ne dia shu teko ekambi kame la Unyashungu, nyu nyeko ekambo ka Unyashungu, la luudu la Unyashungu.

10 Uku aki yediko ya ngandji ka mamba ka Unyashungu, kakandambisha uku uhiki a yimba, dimi lakahiki tshina dia luudu, la ukina ambuhikaka ladiku adio. Keli untu l'untu endi okone ahikandi. 11 Untu heyi mpika tshina dikina, paka tshina diakahikama; dio dieli Jesu Kristu. 12 Keli naka untu ayuhika paunyi la fesa, la mboko y'ave ya ushinga a wulu, la etamba, la adiyu, la nengese, ladiku dia tshina diako — 13 ulimu wa untu l'untu wayenama, ne dia lushi la dienyanyu lu dja layuyala; dja yame yayuhimba ulimu w'untu l'untu okone wewo. 14 Naka ulimu wakahiki untu ladiku dia tshina diako ayutshikala, keti untu aco nungula difutu. 15 Naka ulimu w'untu ayulungula, ndi ayushisha difutu. Kuyanga ndame ayushimbamela, keli uku untu luhandji kwe lu dja.

Nyu Nyeko Etemwelo ka Unyashungu

16 Nu hanyeyi nyati: Uku etemwelo ka Unyashungu mbenyu, la Nyuma ka Unyashungu atudjaseka l'etema anyu?

1 KORETO

17 Naka untu lalanya etemwelo ka Unyashungu, Unyashungu ayuwulanya, ne dia etemwelo kene ka Unyashungu keko ekila. Ndu nyu nyeko etemwelo kako.

18 Untu tayadimbiyaki. Naka untu ambukana ati: Dimi la yimba l'atei anyu, ndi ayali enginya, dia ndi ndjala la yimba, 19 ne dia yimba ya la kete nye yeli enginya lu ashu a Unyashungu. Ne dia ambufundama ati: Ndi atundaka akanga a yimba lu lukesu lawo; 20 la diui dikina ati: Khumadiondjo mbeyaka tukanyi t'akanga a yimba ati: Anyanya mbeto. 21 Okone untu tayatumbulaki lu akambu w'antu, ne dia diango tshe dieko dianyu. 22 Kana Paulu, kana Apolo, kana Kefasi, kana andja, kana lumu, kana nyoi, kana diango dieko, kana diango diayayi, diango diako tshe, dieko dianyu. 23 Ku nyu nyeko wa Kristu; la Kristu keko ka Unyashungu.

Atumami Weli Alami, Khumadiondjo Keli Unumbushi

4 Untu atēyi ati: Ekambi wa Kristu mbesu, la alami w'akambu wa usheshe wa Unyashungu. 2 Ntu le alami, dieli la untu l'untu dia ndjala la kolamelu. 3 Keli le mi, eko dikambu dia tshitshe, dia dimi numbuyama le nyu kana le antu akina; kuku dimi halayalumbuya. 4 Dimi haleyi nduku unungu weli la mi, keli dimi hayindjama osoku. Keli Khumadiondjo atunumbuyaka. 5 Okone tanyulumbuyaki akambu ntundu Khumadiondjo atayi, one layushula akambu wushami wa lu udjima, layushula tukanyi t'etema. Ku untu l'untu ukuyala la diandu diandi uma le Unyashungu.

Akambu Awo Wambutshikitana la Akambu w'Asi Koreto

6 Anyasu, lakanyufundela akambu ami ndu wa Apolo uku wela dikambu dianyu; dia nyetsha shati: Tanyulekaki ntsho la ntundu k'akambu wakafundama; diaha unyanyu omotshi ndjambiya lu dikambu di'untu omotshi ladiku dia unyandi. 7 Untu akona ambukutshikitanya? Engo kakona keli la ye, kakkiye kunungula? Keli naka we akakilungula, ukundi ayandulaye uku we kunungula?

8 Nyu nyambulutaka! Nyambongonaka! Nyu nyambuyala uku khumi ya dikanga, aha kame la su! Kuku, dimi nangaka nyu mbulela ndu shu mbulela kame la nyu. 9 Ne dia dimi lambukana nti: Unyashungu ambutkitisha, shu atumami, l'okongo w'antu tshe, uku antu wakawamia dia mvo; ne dia shu tambuyala

uku endelu ka wa la kete, ndu lu ashu wa andjelo, ndu lu ashu w'antu. 10 Shu tel i akanga a dinginya ne dia Kristu, keli nyu nyeko akanga a yimba le Kristu. Shu teko weodu, keli nyu nyeko la wulu. Nyu nyeko la lutumbu, keli shu teko la dionyo. 11 Edja ndu unya one, shu teko la ndjala, la pusa, ndu utatakata, ndu dikomoki, ndu kema la dihuli dia mbidjase shikaa. 12 Shu tatukambaka ulimu wulu la anya asu. Lam'atotengawo, shu tatatshokolaka. Shu tatushikikalaka lam'atusuyawo. 13 Lam'atonyolawo, shu tatāsengasengsaka. Shu tambuyala uku adiyu wa la kete la mindu ya diango tshe edja ndu kakiante.

14 Dimi hafundi akambu ane dia nyutsha sonyi, keli dia nyewula uku an'ami wa ngandji. 15 Ne dia kuyanga nyu nyeko la elombodi waheyama mbala le Kristu, nyu kema la washenyu efula, ne dia le Kristu Jesu kakamanyuti lu lukumu l'ololo.

16 Okone dimi lambunyosengasenga nti: Nyumbukuyaki. 17 Dia dikambu so, mbakamanyutumela Timote, on'ami la ngandji la kolamelu le Khumadiondjo, dia ndi nyuhula ditshelu diam i dieli la mi le Kristu, uku alakanyami antu l'Ekelezia lu ahuli tshe. 18 Amotshi wambutakula uku dimi handjuya le nyu. 19 Keli dimi layuya le nyu esadi, naka Khumadiondjo alanga. Dimi layushula wulu a wane wambutakula, aha aui awo atu; 20 ne dia diulelu dia Unyashungu diaha lu aui, keli dieko lu wulu. 21 Alanganyu na? Dimi nkandji le nyu la uhamba, kana la ngandji la utema a memakana?

Tanyosohanaki la Antu wa Kolo

5 Lukumu lambuya ati: Munanyi keko l'atei anyu. Wuhu oso kema kuyanga l'atei w'asi wedja, ne dia untu omotshi eko la wadi a shi. 2 Nyu nyambutakula! Nyu kuningalinga, kunanga minya untu lakatshi dikambu so l'atei anyu.

3 Mete, dimba diam i kema l'atei anyu, keli utema ami weko le nyu. Dimi lakalumbuya one lakatshi dikambu so uku dimi laki leko, 4 lu lukumbu la Khumadiondjo Jesu. Lam'asanangananyu, utema ami weko la nyu, ndu wulu wa Khumesu Jesu, 5 dia nyu nkimo untu oso le Satana dia ndi nanya dimba diandi, ne dia utema andi ashimbameli lu lushi la Khumadiondjo Jesu.

6 Ndjatumbula kanyu kema ololo. Nyu hanyeyi nyati: Edya ka tshitshe mvudiaka ukama a ma tshe? 7 Nyunyu edya k'edjeda, dia nyu ndjala uku ukama w'uyuyu waha

la edya. Ne dia Kristu, on'okoko asu w'Elekanelu, akadiakema. 8 Okone nyeso tuli dambu, diaha la edya k'edjeda, diaha la edya ka lutunu la akambu wa kolo, keli la ma dia kawo la mete, diaha la edya.

9 Dimi lakanyufundela lu mukanda ami nti; Tanyosohanaki l'akanga a munanyi. 10 Dimi halati dia akanga a munanyi wa la kete nye, kuyanga akanga w'ekomiya, kuyanga apotwanyi, kuyanga atemodi wa dikishi, lam'ahumbanyu mumo uma la kete nye. 11 Keli dimi lakanyufundela nti: Tanyosohanaki la unyanyu, naka ndi eko umunanyi, kuyanga kanga okomiya, kuyanga ottemodi a dikishi, kuyanga otenganyi, kuyanga umbidjoki a wanu, kuyanga opotwanyi — tanyolekaki l'untu oso. 12 Dimi la dikambu dia numbuya antu wa kana uka? Nyu hanyulumbuya wane weli lu Ekelezia? 13 Unyashungu atulumbuyaka antu wa kana. Nyunya untu a kolo oso uma l'atei anyu.

Hasungana Dia Embetawudi Nsongwanelu

6 Lam'ayuyala untu la dikambu le unyandi, ukundi atshondi la ntufunda la ntundu k'antu wa kolo, aha la ntundu k'ekilami? 2 Nyu hanyeyi nyati: Ekilami wayulumbuya wa la kete, nyu hanyukuki numbuya tukambu tuleki tutshitshe? 3 Nyu hanyeyi nyati: Shu tayulumbuya andjelo? Ndi wuhu wayuleka elumbwelu lu akambu wa lumu lone li! 4 Naka nyu nyayulumbuya akambu wa la kete nye, ku nyu nyayukitsha wane weli anyanya lu Ekelezia l'ulimu wa numbuya uka? 5 Dimi lambunyutela diui ne dia nyutsha sonyi. Ukundi, nduku untu leli la lutui l'atei anyu leya nsambula akambu l'atei w'anyandi? 6 Keli onangu nfundaka onangu, ku nyati: Ndu la ntundu ka wane wahetawo?

7 Mete, dikambu so dieko kolo l'atei anyu, ne dia nyu nyambosongwanelu. Undi, taki ololo dia nyu mbetawo mbikike kolo? Undi, taki ololo dia nyu mbetawo nkesama? 8 Keli nyu nyame nyatutshaka kolo, nyatukesaka ndu anyanyu.

9 Nyu hanyeyi nyati: Antu wa kolo hawukiti diulelu dia Unyashungu? Tanyuyadimbiyaki: atshi w'akambu wa sonyi, kuyanga atemodi wa dikishi, kuyanga amunanyi, kuyanga akanga a nende, kuyanga atshi w'akambu wa sonyi la apami, 10 kuyanga evi, kuyanga akanga w'ekomiya, kuyanga ambidjoki a wanu, kuyanga

atenganyi, kuyanga apotwanyi, vo tshe hawukiti diulelu dia Unyashungu. 11 Nyu amotschi nyaki asoku. Keli nyu nyakayaedia, nyakadidama, nyakayindjama lu lukumbu la Khumadiiondo Jesu Kristu, la le Nyuma ka Unyashungu asu.

"Nyutumbuli Unyashungu lu Alimba Anyu"

12 Dimi la wulu wa ntsha akambu tshe, keli aha akambu tshe mbusunganyi. Dimi la wulu wa ntsha akambu tshe, keli dimi halangi nduku dikambu mbahamelami. 13 Mbu ya nde ne dia dikundju, la dikundju ne dia mbu ya nde, keli Unyashungu ayálanya vo ahendi: ndu dikundju ndu mbu ya nde. Keli dimba aha ne dia munanyi, keli dieko dia Khumadiiondo, la Khumadiiondo ne dia dimba. 14 Unyashungu lakulula Khumadiiondo, ayutulula ndu shu la wulu andi. 15 Nyu hanyeyi nyati: Alimba anyu weli beke dia Kristu? Dimi layunya beke dia Kristu, la diete uku beke di'useka uka? Aha osoku! 16 Nyu hanyeyi nyati: One lamamana la useka, ambuyala la ndi dimba otoi? uku akati Unyashungu ati: Vo ahendi wayuyala otoi. 17 Keli one lamamana la Khumadiiondo, eko la ndi utema otoi. 18 Nyulawo munanyi. Kolo kina yatsha untu, yaha lu dimba, keli one lunana, ambutshela dimba diandi kolo. 19 Nyu hanyeyi nyati: Alimba anyu weko etemwelo ka Nyuma k'Ekila, keli le nyu, kakanyalungula uma le Unyashungu? Alimba waha wanyu; 20 ne dia nyu nyakasumbama la ushinga wulu. Okone nyutumbuli Unyashungu lu alimba anyu.

Dikambu Dia Tshukanelu

7 Lu akambu wakanyafundela, eko ololo le pam, diaha ndi munanda umuntu. 2 Keli ne dia munanyi, pam tshe ayali la wadendi hita; la umuntu tshe ayali la umendi hita. 3 Umi akitshiya wadendi lam'alangandi; ndu wadi akitshiya umi lam'alangandi. 4 Wadi kema la wulu ladiku dia dimba diandi hita, paka umendi; ndu umi kema la wulu ladiku dia dimba diandi hita, paka wadendi. 5 Tanyusehianyaki, tshikima nyambulakan etenyi, dia nyu ndjakimo lu dombelo, ku nyayuyala kame ntu; Satana atukunyuhimba ne dia wodu anyu. 6 Keli dimi lambunyutela aui ane la memakana, aha uku oleme. 7 Dimi nangaka nti: Antu tshe wutuyala uku dimi. Keli untu l'untu eko la ushasha andi uma le Unyashungu, omotshi uhuwo andi, ukina uhuwo andi.

1 KORETO

8 Keli dimi lambutela enyimba la wadi waki edu nti: Eko ololo dia vo ntshikala uku dimi. 9 Keli naka vo haweyi ndjakimela, watshukani, ne dia ntshukanelu ambuleka songu ka munanyi ololo.

10 Ku le atshukanyi, dimi lambudjanga, keli aha Khumadiondjo, nti: Wadi tanganaki uma le umendi 11 (ku lam'ayundangana, ndi atshikali unyimba, kana akaluli le umendi) — umi takimoki wadendi.

12 Keli le antu akina, aha Khumadiondjo, dimi kata nti: Naka unyasu omotshi eko la wadi laha umbetawudi, la umuntu uku ambetawo mbidjase la ndi, ndi tükimoki. 13 Naka umuntu eko la umi laha umbetawudi, naka umendi ambetawo mbidjase la ndi, ndi tanganaki uma le umendi. 14 Ne dia umi laha umbetawudi nkidiamauma le wadendi; la wadi laha umbetawudi nkidiamauma le umendi. Utunduyala aha osoku, tshiki an'anyu hawukidama, keli kakiane vo weko ekila. 15 Keli naka laha umbetawudi ayumo, ndi amo; unyasu kana kadiyesu kema uku fumbi lu akambu ane. Unyashungu akateti lu akambu wa ki. 16 We umuntu, we mbeyaka kana we ayushimbela umeye? We umi, we mbeyaka kana we ayushimbela wadeye?

Untu Atshikali la Unyashungu lu Wuhu Wakindi Lam'akandaweti

17 Untu l'untu akendekende lu akambu wakawusha Khumadiondjo, lam'akaweti Unyashungu. Osoku mbatumudjangelaka Ekelezia tshe. 18 Undi, l'etenetaka kaketama untu, laso ku ndi ambahemaka uehekeli? Ndi atshikali osoku. L'etenetaka kaketama untu, ku ndi atahema uehekeli? Ndi ntahemaki. 19 Mbahema uehekeli eko anyanya, ndu hahema uehekeli eko anyanya, paka nkitanyia elembe wa Unyashungu. 20 Untu l'untu atshikali lu dikambu diaki la ndi ntundu ndi atetama. 21 We aki fumbi lam'akayetama? Yala kaku. Ndu lam'eyaye ntshungwama, utshungwami. 22 Ne dia untu laketama le Khumadiondjo lam'akindi fumbi, ndi eko utshungwami wa Khumadiondjo. Okone untu laketama lam'akindi uyadjasedi, ndi eko fumbi ka Kristu. 23 Nyu nyakasumbama l'ushinga wulu, tanyuyalaki fumbi y'antu. 24 Anyasu, untu l'untu atshikali la Unyashungu lu akambu waki la ndi, lam'akandetama.

Dia Wane Wahatatshuki Ndu Wane Wahatatshukama

25 Dimi kema la olembé a

Khumadiondjo ne dia amantu wa dimuma. Keli dimi lambunyutela tukanyi tami, uku one lakukama ketshi uma le Khumadiondjo, dia ndjala la kolamelu. 26 Okone, ne dia fono keli la su, dimi lambukanu nti: Eko ololo le pami dia ndi ntshikala kaku. 27 We ambukelekama la wadi? tuyangaki nkelekoma. We ambukelekewama uma le wadi, tuyangaki wadi. 28 Keli naka we ambutshuka wadi, we hatshi kolo; naka usekaseka w'emuma ambutshukama, ndi hatshi kolo. Ku antu aho wayuyala la asui lu alimba. Dimi nangaka nyamela uma l'asui aho. 29 Keli dimi lambunyutela nti: Anyasu, nshi yaya ka nshila. L'okongo diku wane weli la wadi wayuyala uku wane waha la wadi. 30 Wane walela wayuyala uku wane wahaleli. Wane wangenangena, wayuyala uku wane wahangenangena. Wane wasumba diango, uku wane waha la diango. 31 Wane wekela diango dia la kete wayuyala uku wane wahadiekela tshe, ne dia efanelu ka kete kayushisho.

32 Keli dimi halangi nyu ndjala la ukananu. One lahatatshuki, atulamaka akambu wa Khumadiondjo, uku weyandi ngenyangenya Khumadiondjo. 33 Keli utshukanyi atulamaka akambu wa la kete, uku weyandi ngenyangenya wadendi, 34 ku ndi ambatana. Osoku ndu umuntu laha la umi, ndu usekaseka w'emuma, vo watulamaka akambu wa Khumadiondjo, dia vo ndjala ekilami l'alimba ndu l'etema. Keli utshukami atulamaka akambu wa la kete, uku weyandi ngenyangenya umendi. 35 Dimi lambunyutela dikambu ne dia ololo anyu. Aha dia nyutadia lu djunga, keli dia nyu ndjala la akambu w'usunganyi, la dia nyu mbeya mamema Khumadiondjo aha la ufutanu.

36 Keli naka untu nkanaka ati: Ndi heyi ndjakimela utsha le osonami andi, naka pusakandi ka dimba kambuleka wulu, ndu naka dikambu diako mbeyaka ntsha, ndi atshi uku alangandi; kawo vo ntshukana — dikambuso kema kolo. 37 Ku one lakikitala l'utema, aha la saki, keli ambeya lama ndjakimela, la ambusanguya l'utema dia mumba usekaseka andi w'emuma, ndi ambutsha ololo. 38 Okone ntshukana, eko ololo; ndu aha ntshukana, eko ololo. Aha ntshukana, ambuleka ntshukana ololo.

39 Wadi ambukelekama le umendi lam'eki umendi la lumu. Keli naka umendi ambovo, ndi mbeyaka ntshukama le one lalangandi. Keli paka lu lulang la

Khumadiondjo. 40 Keli tukanyi tami teko okone nti: Ndi ambuleka ngenangena dia ntshikala kaku. Dimi lambukana nti: Ndu dimi leko la Nyuma ka Unyashungu.

Dia Nde Diango Diakawalambula Dikishi

8 Kakiane, dimi lambunyutela dia diango dia nambula dikishi. Shu mbeyaka shati: Shu tshe teko la bewu. Ewu atutakuyaka untu, keli ngandji katuwudiaka. 2 Naka untu omotshi nkanaka ati: Dimi lambeya dikambu dimotshi, keti ndi atadieyi uku ahumbandi dieya. 3 Keli untu lanlaga Unyashungu, untu oso ambeiyama le ndi.

4 Dia diango diakawalambula dikishi, shu mbeyaka shati: Nduku ekishi keli la eungelu ka mete, ndu nduku Unyashungu ukina weko, tshikima otoi. 5 Diango dieko, dietawo vati: Ditemolatemola kana l'ulungu kana la kete — mete eko "ditemolatemola" ndu "khumadiondjo" efula — 6 keli le su, eko Unyashungu otoi, Shesu lakatungi diango tshe, ndu shu, la Khumadiondjo otoi, Jesu Kristu. Diango tshe dieko uma le ndi, ndu shu teko uma le ndi.

7 Kuku antu tshe haweyi dikambu so, keli amotshi watotemolaka dikishi edja ndu kakiane; watelekaka diango diakawalambula dikishi, ku khum'utema ka wodu kambulanyema. 8 Keli mbu ya nde hayutusukanya le Unyashungu. Naka shu hatuli, shu hatuleka ndjala kolo dikambu so; ndu naka shu tayole, shu hatuleka ndjala ololo dikambu so. 9 Keli nyewo, ndjadjasela kanyu kene tayalaki utakanya le wane weli wodu. 10 Naka one leli wodu ayukena, we kanga ewu, udjashi, ale diango l'etemwelo k'ekishi; ku khum'utema kandi hakikitala, dia nde diango diakawalambula dikishi uka? 11 Okone ne dia ewu kaye, one leli wodu uku ambulana, unyanyu uku lakavu Kristu dikambu diandi! 12 Okone, lam'ayunyutshela anyanyu kolo, lam'ayunyuhuma khum'etema yawo ya wodu, keti nyambutshela Kristu kolo. 13 Okone naka mbu ya nde yayutakanya unyami, keti dimi handjole unatshi pundju, ne dia dimi ntukutakanya unyami.

Okone Akatshi Paulu Dia Ndjadjasela Kandi k'Utumami

9 Dimi kema la ndjadjasela? Dimi kema utumami? Dimi komena Jesu Khumesu? Nyu kema ulimu ami le Khumadiondjo? 2 Naka dimi kema utumami le akina, dimi leko utumami le nyu; nyu nyeko djimbitel y'ulimu ami w'utumami le Khumadiondjo.

3 Oso eli aui ami, wakamateketa le wane wakamumbulaka. 4 Undi, shu kema la wulu wa nde la no? 5 Shu kema la wulu wa mbeteta la wadi leli umbetawudi, uku atumami akina, ndu anangu Khumadiondjo, ndu Kefasi? 6 Kana dimi utu la Baranaba, mbaha la wulu wa nkimo ulimu? 7 Dimbi diakona diayafuta l'ulimu andi? Untu akona lune ekodi w'elua, ku hali elua awo? Untu akona atushaka dungalunga mbu ya nde, ku hano awele adio?

8 Dimi lambuta akambu aso uku untu uka? Eleme hawuti pupu? 9 Ne dia ambufundama l'elembe a Mose ati: Tukeleyaki otei l'unyo a ngombe lam'atatakamakamelu wuhu. Undi, Unyashungu nkanelaka ngombe tshu uka? 10 Ndi hateketa lu dikambu diasu? Elu, dikambu diasu mbakafundama ati: Dieli la untu lafusa, nfusa la elungamelu; la untu lasusula, alungameli dia ndjala la yema. 11 Naka shu takanyunela diango dia Nyuma, undi, dikambu dia wuki mbedio dia shu muna diango dianyu dia dimba? 12 Naka amotshi weli la wulu ladiku dianyu, shu hataleki uka?

Keli shu kuntsha la wulu ako ulimu, ku tambetawo akambu tshe, ne dia tatukutshidia lukumu l'ololo la Kristu. 13 Nyu hanyeyi nyati: Wane watutshaka ulimu a diango di'ekila, watelekaka diango dia lu etemwelo; la wane watutshaka ulimu w'ediakelu, watuyalaka la etenyi kawo uma l'ediakelu? 14 Osoku mbakadjanga Khumadiondjo, dia wane watutaka lukumu l'ololo, wakundja diango diawo uma lu lukumu l'ololo.

15 Keli dimi kundjaosela nduku ema uma lu diango ne. Dimi hanyufundela akambu ane, ne dia mbosa diango ne; ndeka ololo dimi mvvo, uleki untu mbete lutumbu lami anyanya. 16 Naka dimi lambusambisha lukumu l'ololo, dimi kema la dikambu dia ndjatumbula, ne dia okende weko ladiku diam. Fono keko le mi, naka dimi halasambisha lukumu l'ololo! 17 Naka dimi latutshaka okone uma lu lulangu lami, dimi la difutu. Keli naka aha uma lu lulangu lami, dimi la okende wakamalungula. 18 Difutu diam i dieli na? Dio dieko nsambisha lukumu l'ololo lasambishami laha la ushinga, la aha ndjaosela wulu tshe weyami ndjaosela lu lukumu l'ololo.

19 Kuyanga dimi lakayala la ndjadjasela uma le antu tshe, dimi lakayaete fumbi k'antu tshe, dia dimi ndeka mbetawuya antu efula. 20 Le asi Juda, dimi lakayala usi Juda, dia dimi mbetawuya asi Juda. Dime kema la

1 KORETO

tshina di'elembe, ku lakayala uku untu leli la tshina di'elembe le wane weli la tshina di'elembe. 21 Le wane waha la elembe, dimi lakayala uku untu laha la elembe, kuyanga dime laki uku untu laha la elembe wa Unyashungu. Keli laki la tshina dia elembe wa Kristu, dia dimi mbetawuya wane waha la elembe. 22 Le akanga a weodu, dimi lakayala wodu, dia dimi mbetawuya akanga a weodu. Dimi lakayala wehu w'antu tshe, dia dimi nshimbela amotshi. 23 Dimi latutshaka akambu tshe ne dia lukumu l'ololo, dia dimi nkundja yema loko.

24 Nyu hanyeyi nyati: Wane wasaka luwangu, watusakaka tshe, keli otoi omotshi utu kayulungula difutu? Nyusaki luwangu osoku, dia nyu nungula difutu. 25 Untu tshe latedikaka luwangu lu tokenyo, atuyakimelaka lu akambu tshe. Vo watutshaka osoku, ne dia nungula lufule la lutumbu layulana, keli shu tayulungula lone lahalana. 26 Dimi latusakaka luwangu laha la wengengo. Dimi latolokaka, aha uku untu lakomola lopepe. 27 Keli dimi latuyakomolaka, latuyalembiaka lu fumbi, ne dia lam'asambishami akina, dime ntukuyala utunami.

Daku Uma lu Akambu w'Edjedja wa Isariyele

10 Anyasu, dimi nangaka nyu mbeya nyati: Watshesu tshe waki la tshina dia dingi, vo tshe waketi l'atei w'uduwa. 2 Vo tshe wakabatizama le Mose lu dingi la l'uduwa. 3 Vo tshe wakalekaka mbu ya nde ya nyuma kame. 4 Vo tshe wakanokaka diango dia no dia nyuma kame, ne dia vo wakanokaka uma lu Dive dia nyuma diakawayeli. Dive diako diaki Kristu. 5 Keli Unyashungu kongenangena le amotshi wuleki efula, ne dia vo wakalembiama l'usu.

6 Akambu aso wakayala le su dia ntewula, diaha shu ndjala la saki y'akambu wa kolo uku akiwo la saki. 7 Ntu, tanyuyalaki atemodi wa dikishi uku aki amotshi; uku ambufundama ati: Antu wakadjase ne dia nde la no, wakunela ne dia nkenya. 8 Ntu, tatuwanaki uku akatshi amotshi, ku wakavu nunu satu akumi ahendi la satu lushi lame. 9 Ntu, tatuhibaki Khumadiondjo uku akatshi amotshi, ku wakavu l'elui. 10 Ntu, tanyungunangunaki uku akangunanguna amotshi, ku wakavu l'anya w'Unanyishi. 11 Akambu aso wakayala le wo dia mbaewula. Vo wambufundama dia ntewula

l'ekumelu ka tena diaya le su. 12 Okone untu lakana ati: Dimi lambemala, ewo, atukoko. 13 Nduku uhimba waya le nyu, waheyi antu memba. Keli Unyashungu eko la kolamelu; ndi hetawo dia nyu mpimbamba uleki wulu anyu. Keli lam'ayuya chimba, ndi ayunyutshela mbuka ka nyu mpanda dia nyu ndjala la wulu wa nshikikala.

"Nyulawo Otemwelo wa Dikishi"

14 Okone, elangimi ami, nyulawo otemwelo wa dikishi. 15 Dimi lamboteketa uku le akanga a yimba; nyediki nyame aui watami. 16 Dikoho di'otshoko diatshokolasu, dio kema uku ekesanelu kasu lu dikila dia Kristu? Ukama watulasu, vo kema uku ekesanelu kasu lu dimba dia Kristu? 17 Ne dia shu, antu efula, teko ukama wame, la dimba diame, ne dia shu tshe tatosa uma l'ukama otoi. 18 Nyendi Isariyele lu akambu awo wa dimba. Wane watolekaka diango di'ediakelu, vo hawekesanelu l'ediakelu? 19 Ya ukundi atami na? nti: Ma diatuwulambulaka dikishi mbeli dikambu, kana ekishi keli dikambu? 20 Kema, dimi lambuta nti: Elambu watulambulaka asi wedja, ediene mbatuwalambulaka, aha Unyashungu. Dimi halangi nyu mbekesanelu la ediene. 21 Nyu hanyeyi no dikoho dia Khumadiondjo, ndu dikoho di'ediene. Nyu hanyeyi nde uma lu mesa wa Khumadiondjo, ndu uma lu mesa w'ediene. 22 Khumadiondjo kutshasu kendjema uka? Wulu mbulekisu?

Tawulanyaki Ndjadjasela ka Kristu

23 Wulu a ntsha akambu tshe weko, keli aha akambu tshe mbusunganyi. Wulu wa ntsha akambu tshe weko, keli aha akambu tshe mbatudia. 24 Untu tayayangelaki ololo andi, keli untu l'untu ayangeli ukina ololo. 25 Nyuli engo tshe kasundjawa lu kituka, tanyumbwanaki embula ne dia khum'utema, 26 ne dia kete yeko ya Khumadiondjo, ndu diango tshe dieli loko. 27 Naka untu lahetawo ayunyeta, la nyu nangaka ntsho, kanyuli engo tshe kayuwunyukitshiya, tanyumbwanaki embula dia khum'utema. 28 Keli naka untu ayukutela ati: Engo kene kakawakimwela ekishi, tanyolekaki, ne dia untu lakakewudi, la dia khum'utema. 29 Dimi halati dia khum'utema kaye, keli dia khum'utema ka ukina. Okoko wana wukuki ndjadjasela kami numbyuyama le khum'utema kekina? 30 Naka dimi lale, luka lusaka, okoko wana wukukimi ntendama lu diango diakamuki lusaka?

31 Okone kana nyayole, kana nyayono,

kana dikambu tshe diayunyutsha, nyutshi dia lutumbu la Unyashungu. 32 Tanyuyalaki uku utamba a ntakanya: le asi Juda kana le asi Ngirika, kana le Ekelezia wa Unyashungu, 33 uku ndu dimi latongenyangenyaka antu tshe lu akambu tshe. Dimi hayayangela waho, keli latuyangelaka antu efula waho dia vo nshimbamela.

11 Nyumbukuyaki, uku wukuyami Kristu.

Anantu Wakumbi Ete

2 Dimi lambunyandula, ne dia nyu nyatumbuhoka lu akambu tshe, nyatukimelaka ditshelu uku akamanyetsha. 3 Keli dimi nangaka nyu mbeya nyati: Ote a pами tshe eli Kristu, la ote a umuntu eli pами; la ote a Kristu eli Unyashungu. 4 Pами tshe lalomba, kana lata diui l'ote andi ukumbami, ndi ambonyola ote andi. 5 Keli umuntu tshe lalomba, kana lata diui l'ote andi hakumbami, ambonyola ote. Dikambu ne dieli uku ote andi ambunyama divu. 6 Naka umuntu hakumbi ote, ndi anya divu diandi. Keli naka dia umuntu minya divu, eko dikambu dia sonyi; ndi akumbi ote. 7 Mete, kema ololo dia pами nkumba ote andi, ne dia ndi eko efanelu, ndu lutumbu la Unyashungu. Keli umuntu eko lutumbu la pами. 8 (Pами kuntungama uma le umuntu, keli umuntu kakatungama uma le pами. 9 Pами kuntungama ne dia umuntu, keli umuntu kakatungama ne dia pами.) 10 Dia dikambu ne, umuntu eko la dikambu dia ndjala la djimbitelu ya diulelu l'ote andi, lu dikambu di'andjelo. 11 (Keli umuntu kundjala aha uma le pами kana pами aha uma le umuntu, le Khumadiiondo. 12 Ne dia uku akatungama umuntu uma le pами, mbakutama pами uma le umuntu.) 13 Nyuyalumbuya nyame: eko ololo dia umuntu nomba Unyashungu hakumbi ote uka? 14 Ndu akambu w'andja vame hawunyetsha ati: Eko sonyi le pами dia ndi ndjala la divu di'utali? 15 Keli naka umuntu eko la divu di'utali, uku eli lutumbu landi. Ne dia ndi akoyama divu diandi uku ekumbelu kandi. 16 Keli naka untu ayudja tamu, shu kema la etshelu kekina; kuyanga Ekelezia wa Unyashungu kema la to.

Ufutanu la Mesa wa Khumadiiondo

17 Dia nyutela dikambu ne, dimi hanyandula. Ne dia nyu nyatusanganaka aha lu akambu wuleki ololo, keli lu akambu wuleki kolo. 18 Dikambu dia ntundu,

lam'atunyusanganaka l'Ekelezia, dimi lambuka nti: Diatanelu dieko l'atei anyu. Ku dimi mbetawoka lukumu lako yema. 19 Ne dia dieli ndu la ditshikitanelu ndjala l'atei anyu, dia antu w'ololo wenami l'atei anyu. 20 Okone lam'atunyusanganaka, eko wulu dia nyu nde ma dia Khumadiiondo. 21 Ne dia lam'atunyolekaka, untu l'untu atutatelaka mbosa ma diandi; omotshi eko la ndjala, ukina umbidjoki a wanu. 22 Ukundi, nyu kema la mvudu ya nyu nde la no loko? Kana nyu nyatonyolaka Ekelezia wa Unyashungu, ndu nyatutshaka wane waha la diango sonyi? Ukundi ayumunyutela na? Dimi nyanduli uka? Dimi hanyandula lu dikambu ne.

23 Ne dia lakalungula diui uma le Khumadiiondo, diakamanyutela nti: Khumadiiondo Jesu akose ma l'utshu wakandafungama. 24 Lam'akanduki Lusaka, ndi akadiatula; akati ati: Dimba diamne, dio dieko dikambu dianyu. Nyutshaki okone, dia nyu mbuhomi. 25 L'okongo wa ma dia dikolo, ndi akose ndu dikoho; akati ati: Dikoho ne dieli sheki y'uyuyu lu dikila diamne. Nyutshaki okone lam'ayunyudinokaka, dia nyu mbuhomi. 26 Lam'ayunyolekaka dia ne, ndu lam'ayunyonokaka dikoho ne, nyu nyayutela antu dikambu dia nyoi ka Khumadiiondo, edja ndu lam'ayundaya.

27 Okone untu tshe layole ma ne, kana no dikoho dia Khumadiiondo wuhu wahasungan, ndi ayuyala la unungu wa dimba la dikila dia Khumadiiondo. 28 Keli untu ayaediki ndame, ku ali ma ne, ano uma lu dikoho ne. 29 Ne dia one lale ndu lano, ambuyalela ndu ambuyanwela ndame unungu, naka ndi halimbitela dikambu dia dimba ololo. 30 Dia dikambuso, mbatyalaka antu efula weodu ndu la hemo, ndu mbatuvokaka antu efula l'atei anyu. 31 Keli naka shu takayalimbitele shame, ku shu hatulumbuyama. 32 Keli lam'ambutulumbuyama, shu tambusuyama le Khumadiiondo, dia shu tatukanyema kame la wa la kete.

33 Okone, anyami, lam'ayunyusangana la ndjole ma, kanyukunganaki — 34 Naka untu la ndjala, ndi atali lakandi — okone hawunyamia lam'ayunyusangana. Dimi layuyusimbula akambu akina lam'ayumuya le nyu.

Eshasha wa Nyuma Weko Efula, Keli Nyuma Eko Otoi

12 Anyasu, dimi halangi nyu munga dikambu dia Nyuma. 2 Nyu

1 KORETO

mbeyaka nyati: Lam'akinyu asi wedja, nyu nyakanganyama le dikishi diku dia nyumi, uku akanyalombwama. 3 Okone dimi lambuyutela nti: Nduku untu lambuta uma le Nyuma ka Unyashungu ati: Jesu ambudjama mananu; ndu, nduku untu leya mvuta ati: Jesu keli Khumadiondjo, paka uma le Nyuma k'Ekila.

4 Wehu efula wa eshasha weko, keli Nyuma eli otoi. 5 Wehu efula wa dikambelu weko, keli Khumadiondjo eko otoi. 6 Wehu efula w'elimu weko, keli Unyashungu eko otoi. Ndi atutshaka akambu tshe le antu tshe. 7 Keli untu l'untu amboyama enyelo ka Nyuma, ne dia mbakundjiya waho. 8 Ne dia omotshi amboyama diui dia yimba uma le Nyuma; ukina diui di'ewu uma le Nyuma kako. 9 Omotshi mbetawo uma le Nyuma kako; ukina eshasha wa nkonya antu, uma le Nyuma otoi; 10 ukina etshelu k'akambu wa mamba; ukina etelu ka diui; ukina eshihidielu ka nyuma. Ukina wehu ekina w'eteketa; ukina ekadimwelu k'eteketa. 11 Keli Nyuma otoi katutshaka akambu aso tshe. Ndi atukahanyaka le untu l'untu uku alangandi.

Dimba Dieko Otoi, Beke Dia Dimba Dieli Efula

12 Ne dia uku eli dimba otoi, ndu edio la beke efula, la beke dia dimba, kuyanga mbedio efula, dieko dimba otoi; osoku mbeli ndu Kristu. 13 Shu tshe takabatizama lu Nyuma otoi dia shu ndjala dimba otoi — asi Juda kana asi Ngirika, kana fumbi kana wuyadjasedi — shu tshe takanoshama uma le Nyuma otoi.

14 Ne dia dimba diaha leke otoi, dio dieko beke efula. 15 Naka dikaka diayuta ati: Ne dia dimi kema lunya, dimi kema leke la dimba; okone dio diaha leke la dimba uka? 16 Ndu naka tui ayuta ati: Dimi laha su, dimi kema leke la dimba; okone dio diaha leke la dimba uka? 17 Utunduyala dimba tshe diayali su, lendi ututukaka? Utunduyala dimba tshe diayali tui, lendi ututononaka? 18 Keli kakiane Unyashungu ambukitsha beke tshe lu dimba, uku akandalangi. 19 Utunduyala dio tshe diayali leke otoi, ku lendi utuyala dimba? 20 Keli kakiane dio dieko beke efula, keli dimba otoi. 21 Su hadieyi mvutela lunya ati: Dimi kema la ye uhumba. Ntu, ote heyi mvutela ekulu ati: Dimi kema la nyu uhumba. 22 Aha osoku, keli beke diku dia dimba dienasu shati: Dio mbuleki wodu, dieko uhumba. 23 La beke diku dia dimba

dienasu shati: Dio nemiamaka yema tshitshe, dio mbalekasu nemia efula; beke diasu dia dingeno diatuyalaka la kenemo utamanya. 24 Keli beke diasu di'amena hadiuhumbi. Keli Unyashungu akasanganya beke dia dimba, akaleki nemia leke lahumba, 25 ne dia diatanelu diatukuyala lu dimba; keli dia beke dia dimba dialamani pupu. 26 Naka leke lomotshi lambusawa, keti beke tshe nsuwa la lo. Naka leke lomotshi lambolemiama, keti beke tshe ngenangena la lo.

Dimba Dia Kristu Mbentyu

27 Okone nyu nyeko dimba dia Kristu, la untu l'untu eko leke ladio. 28 Unyashungu ambukitsha amotshi lu Ekelezia, ntundu atumami, la hendi amvutshi, la satu embetsha, ku atshi w'akambu wa mamba, ku akonodi la ekimanyidi la embuledi, la ateketshi a wehu w'eteketa. 29 Atumami mbewo tshe uka? Amvutshi mbewo tshe? Embetsha mbewo tshe? Atshi w'akambu wa mamba mbewo tshe? 30 Vo tshe mbeli la eshasha wa nkonya? Vo tshe mbateketa wehu w'eteketa? Vo tshe mbeli ekadimudi w'eteketa? 31 Keli nyutetemali nyanga eshasha wuleki waki.

Dimi layunyenya mbuka kuleki ololo.

"Dikambu Diuleki Wuki ku Ngandji"

13 Naka dimi layoteketa lu eteketa w'antu ndu w'andjelo, keli laha la ngandji, dimi lambuyala uku ohotela wahumawo, kana uku dinyandja diasakanyawo nga nga. 2 Ndu naka layuyala la ushasha wa mvuta aui, naka layeya akambu tshe wa usheshe la bewu tshe, naka layuyala la mbetawo tshe ka nsecola ekungu, keli laha la ngandji, anyanya mbemi. 3 Naka dimi layukaha diango diamti tshe dia mbisha akanga a weula mbu ya nde; naka layukimo dimba diamti dia dio ntshumbama, keli laha la ngandji, dikambu so kema waho le mi.

4 Ngandji keli kanga memakana la ketshi. Ngandji kaha la kandjema, hayaseme, hayambiya, 5 hatshi akambu wa fumbosony, hayangi paka lulanglu landi, hadia akambu wa kolo. 6 Ndi hangenangena lu yenyi, keli atongenangena lu mete. 7 Ngandji atukhukhumeka akambu tshe, atukitshiyaka akambu tshe, atulungamelaka akambu tshe, atukikeka akambu tshe.

8 Ngandji haheko pundju. Keli ditelu di'akambu wahatayi diayushisho; eteketa wayushila; bewu diayushisho. 9 Ne dia shu mbeyaka paka etenyi ketu, tatutaka

etenyi ketu. 10 Keli lam'ayuya akambu w'uluwanyi, akambu w'etenyi wayushisho. 11 Lam'akimi dikenda, dimi lakateketaka uku dikenda, lakukaka uku dikenda, lakakanaka uku dikenda. Kakiante, dimi lambuyala ekumanyi, lambukimo akambu wa dikenda. 12 Kakiante, tatenaka lu lulindu uku efanelu, keli lushi loso, tayenana lu dundji. Kakiante dimi mbevaka etenyi ketu, keli lushi lako, layushihudia tshe, uku akawanshitudia. 13 Kakiante, ambutshikala mbetawo, la elungamelu, la ngandji. Akambu aso asatu, dikambu diuleki wuki l'atei awo ku ngandji.

*Yimba ya Nsambisha Antu
l'Oteketa Weyawo Ambuleka
ya Nteketa Lolendo Ololo*

14 Nyuyelaki ngandji; nyuleki mbuka eshasha wa Nyuma saki, djekaleka ku lu nsambisha. 2 Ne dia one latoteketaka lolendo, ndi hateketa le antu, keli le Unyashungu, ne dia nduku untu luka diui dandi. Keli lu Nyuma, katundutaka akambu wushami. 3 Keli untu lasambisha antu l'oteketa weyawo, atutelaka antu akambu wa mbaudia, wa mbakikitsha, la wa mbasamba. 4 Untu latoteketaka lolendo, ambuyaudia. Keli one lasambisha antu l'oteketa weyawo, ambudia Ekelezia. 5 Dimi nangaka nyu tshe nteketa lolendo, keli lambuleka nanga nyu nsambisha antu l'oteketa weyawo. Untu lasambisha antu l'oteketa weyawo, ambuleka untu latoteketaka lolendo wuki, tshikima ndi kukadimudi aui, ne dia Ekelezia wudiami.

6 Anyasu, naka dimi layuya le nyu lateketa lolendo, waho akona wayumunyukundiya, naka dimi halateketa la nyu dia eshwelu, kana ewu, kana esambishelu, kana wetshelu? 7 Ndu diango diaha la lumu, kana pungi kana losese, lam'ateketawo, naka vo hawutshikitanya oteketa, ukundi weya untu oteketa awo? 8 Naka pungi ayudama la diui diaheyama, untu akona ayuyalongosola dia ndo ta? 9 Okone ndu nyu, naka nyu hanyoteketa wukawo esadi, ukundi wayeya antu akambu watanyu? Ne dia nyu nyayoteketa la lopepe. 10 L'atei w'eteketa tshe weli la kete, nduku otoi weko, waha la kitshimudi yandi. 11 Okone, naka dimi haleyi kitshimudi y'oteketa, ku layuyala uku osendji le untu lateketa; la untu lateketa ayuyala uku osendji le mi. 12 Okone ndu nyu, amangamedi a eshasha wa Nyuma, nyutamanya nyanga mbudia Ekelezia.

13 Okone one latoteketaka lolendo, alombe dia ndi nkadimula aui. 14 Naka dimi layolomba lu lolendo, utema ami ambolomba, keli yimba yami hayoto elua. 15 Kayumutsha? Dimi layolomba l'utema, layolomba ndu lu yimba. Dimi layimba limbu l'utema, layimba ndu lu yimba. 16 Dikambu dikina, naka we ayotshokola l'utema utu, ukundi ayuta untu lahuki ati: Ayali osoku! lu etshokwelo kaye, lam'ahandeyi okone wataye? 17 Mete, we ambuka lusaka ololo, keli untu ukina hudiamma. 18 Dimi lambuka Unyashungu lusaka, ne dia lambunyuleka tshe nteketa lolendo. 19 Keli le Ekelezia, dimi nangaka nteketa aui atanu la yimba yami dia dimi ndakanya akina, ambuleka nteketa aui nunu dikumi lu lolendo ololo.

*Nsambisha Antu Oteketa Weyawo,
Atudiaka Antu*

20 Anyasu, tanyuyalaki uku akenda lu yimba. Nyuyali uku ana w'ashashi lu kolo, keli nyuyali uku dikumanyi lu yimba. 21 Ambufundama lu elemba ati: Layoteketa le antu aue lu eteketa w'antu wahaweyi, la lu enyo w'antu w'angendangenda; kuyanga osoku, vo hawumbukela, mbata Khumadijondjo. 22 Okone nendo yaha uku djimbitelu le embetawudi, paka le wane wahetawo. Keli esambishelu keli djimbitelu le embetawudi, aha le wane wahetawo. 23 Okone, naka Ekelezia tshe wambusangana kame, la tshe wamboteketa nendo, naka antu wayoto waheyi, kana waha embetawudi, vo hawuti vati: Akanga w'aladi mbenyu uka? 24 Keli naka vo tshe wambusambisha, ku lam'ayoto untu laha umbetawudi, kana laheyi, ndi ayutshumwama, ayulumbuyama le wo tshe. 25 Akambu wushami l'utema andi, wayusho, ku ndi ayukhusama, ayotemola Unyashungu; ayuta ati: Unyashungu eko l'atei anyu mete.

*Akambu Tshe Watshami
Dia Mbudia Antu*

26 Ya ukundi, anyasu? Lam'ayunusangana kame, untu l'untu eko la usambu, kana wetshelu, kana enyelo, kana lolendo, kana ekadimwelu ka lolendo. Akambu tshe watshami dia mbudia antu. 27 Naka untu ayoteketa lolendo, ololo ahendi, ahendi watekete, talekaki asatu. Untu l'untu katekete l'etena kandi, ku untu omotshi ayukadimula. 28 Keli lam'ayuyala kema ukadimudi, ndi alembohali l'atei w'Ekelezia; ndi ayateketele, atekete le Unyashungu.

1 KORETO

29 Amvutshi watekete kana ahendi ahendi, kana asatu asatu, akina washihudia. 30 Keli naka dikambu diambenyama le untu ludjashi loko, untu a ntundu alembohali. 31 Ne dia nyu tshe mbeyaka mvutanela diui untu l'untu, dia nyu tshe mbeya, la dia nyu tshe nkikitshama. 32 Nyuma y'amvutshi yambolembiamma le amvutshi; 33 ne dia Unyashungu aha Unyashungu wa uftutanu, keli eko Unyashungu wa ki.

"Amantu Walembohali lu Ekelezia"

Uku lu Ekelezia tshe w'ekilami, 34 amantu walembohali lu Ekelezia, ne dia hawetawoma dia vo nteketa, keli vo wakitshakitsami, uku wata ndu elembe. 35 Naka vo nangaka mbeya dikambu, wambuli waumewo lu ngelu yawo, ne dia eko dikambu dia sonyi dia umuntu nteketa lu Ekelezia. 36 Ya ukundi? Uma le nyu mbakatshu diui dia Unyashungu? Kana paka le nyu mbakadiaye?

37 Naka untu omotshi ambuyakana ati: Umvutshi mbemi; kana ati: Kanga Nyuma kemi, ndi alimbiteli akambu wamumunyufundela nti: Vo weli uku olembwa Khumadiondjo. 38 Keli naka untu heyi, ndi atshikali la heyi kandi. 39 Okone nyu anyami, nyuleki ndjala la saki ka nsambisha, tanyusikeki antu nteketa nendo. 40 Keli akambu tshe watshami la dimena ndu uluwanyi.

Esanganyelu ka Lukumu l'Ololo

15 Anyasu, kakiane dimi lambunuylimbitshiya lukumu l'ololo lakaman-yusambishaka, ndu lakanyalungula, lu lako lemadinyu. 2 Nyu nyakashimbamela la lukumu lako, naka nyayushikikala lu diui diakamanyusambishaka —kana nyu mabetawo wetawatowa.

3 Ne dia dimi lakatanyutedi dikambu diakamalungula nti: Kristu akavu ne dia kolo yasu, uku wata afundelu. 4 Ndi akakhundama; akulwama lushi la satu uku wata afundelu. 5 Ndi akene le Kefasi; l'okongo diku le ambeki dikumi la ahendi. 6 L'okongo diku, ndi akene le anyasu wuleki kama tshanu l'etena kame. Etenyi kawo kuleki, weki la lumu edja ndu kakiane, keli amotshi wambuwo. 7 Ku ndi akene le Jakoba; l'okongo diku, le atumami tshe. 8 La ndjihelu, ndi akene ndu le mi, uku le ona uhasa. 9 Ne dia dimi lambuleka atumami tshe tshitshe, dimi hakuki ololo dia mabetama ati: Utumami, ne dia lakanuyaka Ekelezia wa Unyashungu. 10 Keli ne dia

ngandji ka mamba ka Unyashungu, mbemi uku wemi one; ngandji ka mamba kandi kakandambisha, taki anyanya. Keli dimi lakaleki tshe ntsha ulimu efula, aha dime, keli ngandji ka mamba ka Unyashungu kaki la mi. 11 Okone kana dimi, kana vo, shu tatusambishaka, ku nyu nyaketawo.

Eulwelu ka Jesu Uma lu Nyoi, Eko Djimbitelu ya Eulwelu Kasu

12 Naka wambusambisha dikambu dia Kristu vati: Ndi akulwama uma lu nyoi, ukundi wata amotshi anyu nyati: Nduku eulwelu k'uma lu nyoi keko? 13 Utunduyala kema eulwelu k'uma lu nyoi, tshiki Kristu kumbulwama. 14 Utunduyala Kristu kumbulwama, tshiki esambishelu kasu keko anyanya, ndu mabetawo kanyu keko anyanya. 15 Ee, shu tambutanema emenyi wa kashi wa Unyashungu, ne dia shu takati shati: Unyashungu akulula Kristu, kakindi kumbulula, naka wavo hawulwama. 16 Naka wavo hawulwama, tshiki ndu Kristu kumbulwama. 17 Naka Kristu kumbulwama, keti mabetawo kanyu keko anyanya; nyu nyeki lu kolo yanyu. 18 Ntu, ndu wane wambubo le Kristu, wambushisho. 19 Naka shu tambulungamela Kristu lam'ekisu la lumu lone lutu, ku shu tambuleka antu tshe nsuyama.

20 Keli kakiane Kristu ambulwama uma lu nyoi, ndi keli olonga a wane wakavu. 21 Ne dia nyoi akayi uma le untu, ndu eulwelu k'uma lu nyoi kakayi uma le untu. 22 Ne dia antu tshe watuvokaka uma le Adama, wuhu ako mbayuyala antu tshe la lumu uma le Kristu. 23 Keli untu l'untu lu dihili diandi: Kristu olonga a ntundu; l'okongo, wa wane weli wa Kristu lam'ayundaya. 24 L'okongo diku, ekumelu kayuya lam'ayundukimo diulelu le Unyashungu Shesu, lam'ayundulanya diulelu tshe, luwandji tshe, diahamelu la wulu tshe. 25 Ne dia dieli la ndi mbulela, edja ndu lam'ayundukamela atunyi andi tshe la tshina di'ekulu andi. 26 Utunyi a djihelu wayolembiamma eli nyoi. 27 Ne dia Unyashungu akalembia diango tshe la tshina di'ekulu andi. Keli lam'akandati ati: Diango tshe diambolembiamma, shu mbeyaka shati: Ndi hati one lakayalembiya diango tshe. 28 Lam'ayuyala diango tshe diolembiammi le ndi, ndu Ona ndame ayolembiamma le one lakayalembiya diango tshe, dia Unyashungu ayali la diku dia diango tshe, la lu diango tshe.

Batiza ne dia Wavo

29 Naka aha osoku, ukundi atutshaka wane watusambishaka antu wakavu? Naka antu wakavu hawulama, okoko wana wābātizamelawo? 30 Dikambu diakona diesu las'eku la nyoi tena tshe? 31 Anyasu, dimi lambushikisha diui dia ndjatumbula kami le nyu, keli le mi uma le Kristu Jesu Khumesu nti: Dimi latuvokaka nshi tshe! 32 Naka dimi lakalo la nyama ta 1'Efeso uku etshelu k'antu, na waho weli le mi na? Naka wavo hawulwama, tolekaiki, tonokaki, ne dia shu tayovo lui. 33 Tanyukesamaki. Diendje dia kolo diatulanyaaka ditshelu di'ololo. 34 Nyosene lu akambu w'ololo, tanyutshaki akambu wa kolo, ne dia amotshi haweyi Unyashungu. Dimi lambuta osoku, ne dia nyutsha sonyi.

Eshihudielu ka Eulwelu k'Uma lu Nyoi

35 Keli omotshi ayuta ati: Ukundi wulwama antu wakavu? Wuhu akona a dimba wayuwuya la dio? 36 We nginyanginya! kene kunaye weme lu kete, hatumbi tshikima to kambuvo. 37 La kene kunaye, we hune utundu w'engo, keli we ayune paka wuhu utu, kana wa epunga, kana wuhu ukina. 38 Keli Unyashungu atushaka wuhu uku utundu, uku alangandi: wuhu la wuhu utundu awo. 39 Emunyi tshe kema pupu, kema wuhu otoi, keli omotshi weli w'antu, ukina weli wa nyama, ukina wa fudu, ukina wa nsi. 40 Etundu wa l'ulungu weko, ndu etundu wa la kete weko. Keli lutumbu la diango dia l'ulungu leko lomotshi, lutumbu la diango dia la kete leko lukina. 41 Unya eko la lutumbu lawo; ngondo eko la lutumbu lukina lato. Toto teko la lutumbu lukina lato, ne dia yoto la yoto yambutshikitanu la lutumbu.

42 Osoku mbeli eulwelu ka wane wakavu. To kambunema engo k'ehondelo, kambulwama engo kahahonde. 43 To kambunema la dionyo; kambulwama la lutumbu. Kambunema la wodu; kambulwama la wulu. 44 Kambunema dimba ku dimba; kambulwama dimba dia Nyuma. Naka dimba ku dimba dieko, keti ndu dimba dia Nyuma dieko. 45 Uku ambufundama ati: Untu a ntundu, Adama, akayala kanga lumu. Adama a ndjihelu akayala Nyuma ka mbishaka antu lumu. 46 Keli one la dimba keli la ntundu, aha one la Nyuma, l'okongo diku one la Nyuma. 47 Untu a ntundu eko lu kete, untu a ditshu, untu la hendi eko uma l'ulungu. 48 Uku eli one la la kete, mbeli wane wa la kete; uku eli one la l'ulungu, mbeli wane wa l'ulungu.

49 Uku wesu lu efanelu ka one la la kete, wuhu ako mbayutuyala lu efanelu ka one la l'ulungu. 50 Anyasu, dimi lambunyutela nti: Umunyi la dikila haweyi nkita diulelu dia Unyashungu; kuyanga engo k'ehondelo nkita engo kahahonde.

"Nyoi, Elekelu Kaye Eto Na?"

51 Nyulungi, dimi lambunyutela dikambu diushami! Shu tshe hatulala djo lu nyoi, keli shu tshe tayukadimo, 52 esadi, uku kamula ka su, lam'ayuda pungi ka ndjihelu. Ne dia pungi ayuda, antu wakavu wayulwama l'alimba wahahonde ku shu tayukadimo. 53 Ne dia dieli la kene k'ehondelo dia ndota kene kahahonde, dieli la kene ka nyoi dia ndota kene kaha la nyoi. 54 Keli lam'ayolota kene k'ehondelo kene kahahonde, lam'ayolota kene ka nyoi kene kaha la nyoi, ku diui diufundami diayushidiyama ati: Nyoi ambolembiamma l'elekelu. 55 Nyoi li, elekelu kaye eto na? Nyoi li, wanga aye ewo na?

56 Wanga a nyoi eko akambu wa kolo; la wulu w'akambu wa kolo eko elebem. 57 Keli tuki Unyashungu lusaka, one latutshaka elekelu uma le Khumesu Jesu Kristu.

58 Okone, anyasu wa ngandji, nyutetemali, nyushikikali, nyutamanya ntsha ulimu wa Khumadiondjo nshi tshe, ne dia nyu mbeyaka nyati: Pa kanyu le Khumadiondjo kema anyanya.

*Diango Diakawakongwela
Asi Jerusalema*

16 Dia diango diakawakongwela ekilami, nyutshi uku akamadjangela Ekelezia wa la Ngataliya. 2 Lu lushi la ntundu la lubingu, untu l'untu l'atei anyu umbi diango lakandi uku akundjandi, dia nyu nyutukuyokongola diango lam'ayumuya leko. 3 Lam'ayumukuma, antu wayunyosonola, mbayumutuma la mikanda dia ntola eshasha anyu utsha la Jerusalema. 4 Naka eko ololo dia ndu dimi ntsho, vo wayusamba la mi kame.

5 Keli dimi layuya le nyu lam'ayumeta la Makedoniya, ne dia layeta la Makedoniya. 6 Undu, dimi layudjase lakanyu etenyi undu, kana ngondo ya tshitshi tshe, ne dia nyu ntatshokaka la mi lu lokendo tshe layumutsho. 7 Ne dia dimi halangi ntanyenyi wusu utu kakiane; ne dia lambulungamela mbidjase lakanyu nshi motshi, naka Khumadiondjo ayetawo. 8 Keli dimi layutshikala 1'Efeso, edja ndu Pentekosta; 9 ne dia suku dia wuki diambundjhwamela, dia dimi ntsha ulimu, la atunyi efula weko leko.

1 KORETO

Paulu Ambuwatela Lama Ntshela Timote la Akina

10 Lam'ayuya Timote, kanyuwendaki, atukuyala la woma l'atei anyu, ne dia ndi atukambelaka Khumadiondjo ulimu uku dimi. 11 Untu tawonyolaki. Keli kanyútumi lu lokendo landi la ki, dia ndi ndja le mi, ne dia lambülungamela la anyasu.

12 Keli dia unyasu Apolo, dimi lakôsengasenga efula dia ndi ndja la anyasu le nyu, keli ndi kunanga ndja kakiane. Ndi ukuya lam'ayundenia dihuli dia ndja.

13 Nyosene, nyushikikali lu mbetawo, nyutshaki uku apami, nyukikitali. 14 Nyutshi akambu anyu tshe la ngandji.

15 Anyasu, nyu mbeyaka nyati: Khumbu ka Stefana mbaki antu wa ntundu wakakadimula etema l'Akaya, ndu mbakayakimo dia ntshela ekilami ulimu. 16 Dimi lambunyosengasenga nti: Nyuyali l'okongo w'antu a wuhu ako, la w'untu tshe latutukimaniyaka l'ulimu, la latenaka pa.

17 Dimi lakangenangena lam'akayi Stefana, la Forotunato, la Akayiko. Vo wambukuka lu dihuli dianyu lam'ahanyu lindu, 18 ne dia vo wakakikitsha utema ami ndu etema anyu. Okone nyolemia antu a wuhu uku.

Paulu Ambâtumela Moyo

19 Ekelezia wa l'Asiya wambunyutumela moyo. Akula la Piriska, ndu Ekelezia welu lu luudu lawo wambunyutumela moyo efula le Khumadiondjo. 20 Anyasu tshe wambunyutumela moyo. Nyushani moyo l'ononanelu w'ekila.

Diui di'Etshokwelo

21 Dimi, Paulu, kufundji moyo one la lunya lami dime. 22 Untu lahuki Khumadiondjo ngandji, adjami mananu. Khumesu, yaka! 23 Ngandji ka mamba ka Khumadiondjo Jesu Kristu kayali la nyu. 24 Ngandji kami kayali la nyu tshe le Kristu Jesu! Ayali osoku!